



Synfocity = 693

mail us at : mzsynfo@gmail.com; mizoramsynod@gmail.com - Phone - 2314648

July 12, 2018

□ Pi Zosiami (Mrs. Mair Edwards) vuinnaah Synod Hotute

Pi Zosiami (Mair Edwards) chu July 1, 2018 zan dar 10:30 vel khan Wrexham (Wales)-ah Pneumonia leh lung natna (heart problem) vangin a thi a, July 12, 2018 (Ningani) hian vui a ni dawn a, PCI Moderator (Mizoram Synod Senior ES ni baw) Rev. Lalramliana Pachuau leh kan Synod Moderator Rev. F. Lalrinnunga te Presbyterian Church of Wales Gen. Assembly (July 9-11, 2018) hmanpuia kal mekte chu Pi Zosiami vuinaah hian an tel ang. Pi Zosiami hi Mizorama Welsh Missionary Rev. Samuel Davies-a (1937 -1951) fanu a ni a. Mizo ho inkoh dan ang thlapin amah Pu Samuela hi Zosiami Pa tia hriat a ni a. A nupui Pi Samueli pawh zirtirtu tha tak a ni a, lemchan (drama) thiam a ni baw a. Drama lama Mizote tihmuhtu leh kaihruaitu hmasa a ni. An fanu Zosiami hian Mizotawng a thiam em em a, Mizo naupang a kawm nasa a, an chhungkua hi mipuiin an nelin an ngaisang em em thin a ni. Pi Zosiami hi kan Missionary vek Rev. David Edwards-a (1933-1941) fapa Royce Edwards (Zorema) nen an innei a. Missionary fa ve ve innei hi thil vang tak a ni awm e. Mizorama Welsh Missionary kan neih zingah mi dang an awm lo. Royce Edwards hi a Mizo hming chu Zorema a ni a. A pa, Rev. David Edwards-a pawh Pi Zosiami pa an koh dan bawkin Zorema Pa tia hriat lar a ni a. Rev. David Edwards hi Young Lushai Association (a hnuah YMA) dintute zinga mi niin Treasurer hmasa ber a ni nghe nghe. Pi Zosiami leh Pu Zorema te fapa te zawk Dr. Owain Edwards hi kum 1993-ah Mizoramah lo chhuakin kan Synod Hospital a rawn tanpui a. A U Rev. Hywel Edwards leh a nupui Julie ten 2016 November thlaah Mizoram an rawn tlawh baw. Tin, kumin May thla khan Dr. Owain Edwards hi Rev. Anuerin (Zolawma) nen lo zin leh in Synod Hospital an rawn tlawh a, Synod Office Morning Devotion te an hmanpui baw a ni.

□ Synod Bookroom Reduction Sale 2018

Synod Bookroom chuan July 9, 2018 (Thawhtanni) atanga July 14, 2018 (Inrinni) thleng awn tur Reduction Sale chu Mizoram puma Synod Bookroom Branch zawng zawng leh Churachandpur-a Synod Bookroomah te a tan leh ta. Synod Bookroom Reduction Sale hi a rualin Mizoram pumah zing dar 9 khan tan a ni a. Tun tum Reduction Sale hi tum dang ang lo takin Synod Bookroom Branch bakah Distributor zawng zawngah neih a ni. Reduction Sale-ah hian Synod Bookroom-a lehkhahu zawng zawng, Bible, Kristian Hla bu, Communion thil, Kohhran mamawh chi hrang hrang, Stationery Item zawng zawng leh School Naupang mamawhte 5% - 80% discount-in hralh chhuah a ni a. A tan tirh ni atangin mipuiin an hlut hle. Synod Bookroom Reduction Sale hi mipuiin lehkhahu tha leina hun remchangah hmangin an hlut hle thin a. Sorkar Office, Kohhran leh Mimal Library neite pawhin a hlawma lehkhahu leina hunah an lo hmang tawh thin. Nikum 2017 Reduction Sale-a kar khat chhunga lei chhuah kha Rs. 83,38,479.00/- lai a tling a. Kumin hian kum hmasa lama sale zat te hi khum ngei an inbeisei thu Synod Bookroom lama hotute chuan an sawi.

Tun dinhmunah Synod Bookroom hian Branch 15 leh Distribution Centre 37 a nei a, lehkhahu item hi 5,500 chuang zet an nei tawh a ni.

□ Lay Leaders' Training vawi 204-na hawna neih a ni

Synod Multipurpose Training Centre (SMTC) buatsaih, Lay Leaders Training vawi 204-na chu SMTC Lecture Hall-ah July 10, 2018 (Thawhlehi) zan khan Pathian hnena hlanin hawna hun hman a ni. Training hian July 16, 2018 thleng a awn ang. Tun tum training-ah hian Presbytery pali - Aizawl Chhimthlang, Aizawl Hmar, Kolasib leh Tlawng atangin Kohhran Upa 24 an tel thei a ni. Training hawna inkhawmah hian Rev. Vansawma, Proramme Director, SMTC-in hawna leh thuchah a sawi a, Nl. Lalthanmawii a zai a, Rev. C. Chawngliana, Resource Person-in malsawmnain inkhawm a thin a ni. Hetiang hunah hian Kohhran Upate tan Kohhran enkawl dan leh inrelbawlna lam atana pawimawh chi hrang hrangte zir thin a ni a, Kohhran thlarau lam nun enkawl dan tha te zirho thin a ni baw. Tun tumah hian Rev. C. Chawngliana, Rev. Vanlalzuata leh Rev. Lalchungnunga te'n training hi an neihpui ang. Kohhran Upate tana Lay Leadership Training hi kum 1996 atang khan neih tan niin vawi 203 lai neih a ni tawh a, Kohhran Upa 6,542 zetin training hi an nei tawh a ni. Training kharna inkhawm hi July 14, 2018 (Inrinni) zanah neih a ni dawn a, Rev. H. Remthanga, Synod Finance Officer-in Certificate semin thuchah a sawi ang.

Synod Multipurpose Training Centre (SMTC) hi kum 1993 Synod-in din tura a rel angin January 12, 1996 khan din a ni a, a tira a hming chu Christian Multipurpose Training Centre tih niin kum 2001 Synod khan a hming hi Synod Multipurpose Training Centre tiin a thlak leh a ni.

Synod Multipurpose Training Centre (SMTC) hnuaiyah hian thalaite'n mahni kuta eizawna kawng an lo neih ve theihna tura training chi hrang hrang (Vocational Training) buatsaih thin a ni baw a, tunah hian trade chi hrang 6 kalpui mek a ni a, zir chhuak tawh mi 1,409 awmin zirlai 81 an nei mek baw.

Contd...

☐ **Education**

Kumin 2018 - 2019 session kal lai mek, tun dinhmuna Presbyterian English School-a zirlai leh thawktu neih zat hetiang hi a ni. Presbyterian English School hnuaiyah School 136 awmin zirlai 29,623 an awm a, Teaching Staff 1,535 leh Non-Teaching Staff 132, an vaiin thawktu 1,667 an awm a ni.

☐ **SL&PB**

July 14 & 15, 2018 chhung hian Bairabi Bialah Literature Seminar neih a ni dawn a, training neihpui turin Upa H. Ronghaka, Additional Editor leh Upa. Dr. C. Vanlalhruaia, Comt. Member te an kal.

☐ **Synod Social Front**

♦ July 9, 2018 (Thawhtanni) chawhnu dar 2:00 khan Synod Social Front hruaitute leh Central YMA hruaitute Rev. B. Sangthanga, Exe. Secretary Room, Synod Office-ah ruihhlo do chungchangah an inkawm. Synod Social Front lam atangin Exe. Secretary leh Co-ordinator te an tel a, CYMA lam atangin Vice President, General Secretary, Treasurer leh Finance Secretary (SRS Convener ni baw) te an tel. Synod Social Front leh CYMA te hian ruihhlo do kawnga thawhho zel an rel a. Hemi kawnga hmalakna pakhat atan SRS ten an mi mante, Pathian thu lama counselling lo neihpui thin turin Synod Social Front chuan Counsellor pakhat a ruahman nghal baw a, a tul anga hma lakho zel tum a ni.

♦ July 14 & 15, 2018 chhung hian N. Vanlaiphai Damdawi In Veng Bialah Political Education Seminar leh Campaign nei turin Resource Person pathum Rev. Zoramsanga, Rev. Lalrintluanga leh Upa Lalzuithanga te an kal ang.

☐ **Trust**

July 11 - 14, 2018 chhung hian Chalrang, Hnahlan leh Zote-ah te Pastor Quarters retaining wall siam tur enpuin Pu Lalhriatrenga, JE a kal.

☐ **Kohhran Hmeichhia**

♦ July 14 & 15, 2018 chhung hian Sihfa Bialah Leadership training leh Kristian Chhungkaw Campaign nei turin Central Kohhran Hmeichhe committee member-te Pi Bualchhumi, Pi Lalsangluaii, Pi Lalhiapi leh Pi Vanlalrovi te an kal ang.

♦ July 14 & 15, 2018 chhung hian Damparengpui Bialah Leadership training leh Kristian chhungkaw Campaign neih a ni dawn a, Central Kohhran Hmeichhe Committee member-te - Pi Lalnunsiami, Pi Zodingliani leh Pi R. Lalrampari te an kal ang.

☐ **KTP**

July 4 - 7, 2018 chhung khan Synod Choir term tharte chuan Synod Conference Centre-ah hla zir camp an nei a. Hla zir camp-ah hian Synod Choir-in hla an lo zir tawh thinte, member tharten an thiamna turin an zir thar leh a, hla thar eng emaw zat an zir baw. July 7, 2018 (Inrinni) tukthuan ei khamah an chhuak a ni.

☐ **Prison Ministry**

July 12, 2018 (Ningani) hian Serchhipah Prison Ministry Programme siam bawhzuiin Rev. R. Lalvulluaia, i/c Prison Ministry a kal.

☐ **Zin**

♦ July 5 - 18, 2018 chhung hian P.C Wales General Assembly hmanpuin Rev. F. Lalrinnunga, Synod Moderator leh PCI Moderator (Mizoram Synod Senior ES ni baw) Rev. Lalramliana Pachuau te an kal.

♦ July 10 - 14, 2018 chhung hian Manipur-ah Tuithaphai Presbytery nena thawhhona chungchang meeting neiin Rev. B. Sangthanga, Exe. Secretary a kal.

♦ July 13 - 16, 2018 chhung hian Darlawn-ah Bial Jubilee hmanpui turin Rev. P.C Pachhunga, Exe. Secretary a kal ang.

☐ **Hruaina Eng FM Radio**

♦ **JULY 13, 2018 (FM Zoawi Aizawl & FM Lunglei @ 7:30 p.m.):**

DUET : Arini & Cindy - An fak ning lo'ng, ZAIPAWL : Bethlehem Pastor Bial - Kan tlanna ni ropui, THUSAWI : F. Lalenghluna - Nu leh Pa thuawih, SOLO : Jennie Lalruatfeli - Ka thinlung lawmna, ZAIPAWL : Mizoram Synod Choir - Min hruai thin

☐ **Hruaina Eng TV Programme**

Susamachar Prasaran Programme

♦ **JULY 15, 2018 (Pathianni) 5:00 pm. :**

Group/Choir/Solo : Electric Bial Masihi Sangati Zaipawl, Group/Choir/Solo : Chawnpui Kohhran - Saron Ka Gulab, Sermon : Rev. Laltharzuala - Sansar se Prem na karo, Group/Choir/Solo : Dawrpui Bial Masihi Sangati - Jaya, Group/Choir/Solo : Melthum Masihi Sangati - Krista Zara Unau

♦ **JULY 15, 2018 (Tv Programme) @ 4:00 - 6:00, 8:00 - 9:00 p.m) :**

Sermon : Rev. Sairengpuia - Mizote hi fa hring tura koh kan ni, Weekly Round Up, Missionary Interview : Arunachal & Assam West

Synod Social Front Helpline: 9089777129;

Tuai & Patil Helpline : 8729800130;

Students' Helpline : 9856883377

www.MIZORAMSYNOD.ORG

Synod Information & Publicity
Phone - 2314648

Synfo